

四庫全書

集部

欽定四庫全書

滋溪文稿卷十五

元 蘇天爵 撰

碑誌

元故武義府郎漳州新軍萬戶府副萬戶趙公神

道碑銘并序

公姓趙氏諱伯成真定人也考府君偉國初以才勇從丞相史忠武王平金擢黑軍百戶歲庚申公始襲職隸

萬戶邱公麾下移兵戍守歸德己未從邱公濟江攻鄂
中統三年李璫反公與賊戰有功邱公旌幣三端改隸
招討使額特默色麾下別將巴圖軍百人至元十有一
年天兵渡江從攻沙陽新城陽羅堡因戍黃州進攻隆
興撫州建昌皆下之十三年宋亡宋臣陳宜中張世傑
挾益衛兩王走閩海表年官人圖復宋其下倡亂從之
閩大擾公從招討使攻建寧降之行省署公建寧安撫
司達魯噶齊明年政和慶元民亂公討平之吳聖公倡

浦城人爲亂公勦除其衆左副元帥高某薦之復以公
兼權建寧路萬戶於是招募土兵千人教之擊射皆號
精兵盜聞公威名或斂避不敢犯民亦少獲其休息焉
朝廷嘉之特錫金符制授武畧將軍管軍千戶公益奮
激思自效十七年春都昌民杜萬一挾左道媚人表僭
名號構亂一方公偕方安撫生擒萬一磔龍興市賞公
白金五十兩復以管軍萬戶守建寧十八年制授管軍
總管進階武義將軍是年秋漳州高安賊作樹柵以爲

固公命作雲梯先登攻破其柵擒之二十年冬黃華賊起公引兵覘之抵萬墩與賊遇敗之又抵歐寧之黃屯與賊遇又敗之斬首不知其數餘皆敗走復屯歐寧之板橋公又敗之未幾賊號二十萬復來分據建寧四面以視必取公潛出兵水南賊發矢如雨下公不為動乃泅水以濟諸軍從之大呼殺獲無算賊披靡遁公追殺之且行且戰三十餘里僵屍藉藉被山野又捕虜數百人時黃花餘黨散在政和之青州及獅子岩者公皆破

之賊患遂息行省檄公守松溪政和兩縣二十四年移南劍是秋尤溪賊作公又平之招諭民之脅從者俾居其鄉乃還鎮是冬鍾明亮兵起公偕福州路達魯噶齊托歡捕之轉攻南劍及邵武諸盜皆大破之平章拜除表公前後戰伐以聞制可其請超拜漳州新軍萬戶府副萬戶二十六年冬平寧化黃化石門等柵二十八年省府以漳之龍岩羣盜之所出入移公守之乃招諭賊魁謝大老等來歸二十九年漳浦賊作公從樞府臣破

之復留公守雲霄隘於是招諭魯小虛神歸化而魯大
虛負險不出公復以兵臨之大虛亦降其餘黨尚為民
患公提勁兵搽之省臣以南詔之地控制循海潮廣諸
郡檄公鎮之仍總雲霄之兵凡二年盜不敢犯民甚安
之大德初元劇賊劉大老犯漳州境公將兵迎戰刀中
公頂及腰猶與賊戰不已於時公年六十七矣遂移疾
北歸行省不允公復以為請久之方聽其去至大二年
正月十有九日卒於家享年七十有七葬真定縣新市

鄉別駕莊之西原公貌魁梧力能兼人平生大小盖百餘戰身被十餘創其勞勩何如也初公至閩閩人即降同列建議請計口徵銀為贄禮號令嚴急民大驚恐公傍通衢立罷其事合郡歡聲如雷呼公為佛建議者暴死民大稱快公綏輯新附簡易寬厚民以為便立祠祠公迄今不墮嗚呼昔者王師伐宋曾未數年降其君臣墟其廟社已而遺民在在蠶起何其取之之易安之之難若是歟余讀周書每嘆周人滅殷之易安殷民之難

也大抵古今人情不甚相遠益知書之為可盡信公母
高氏夫人常氏如夫人者七子四男人仲立德明寧老
仲信女三人長適真定劉某次適建寧謝某幼為比丘
尼孫男十人成立君佐君澤君弼君哲君傑君和君讓
君祥君瑞曾孫男二人真保關保公歸元子仲立嗣仲
立卒弟德明嗣德明卒仲立之子成立嗣成立卒今其
子真保嗣焉天爵與公同里少嘗拜公酒酣耳熱語其
平生戰攻之勞英氣凜凜真一世豪傑之士哉銘曰

南北分裂世祖荒之滔滔江漢一葦杭之宋社既墟頑
民胥動借曰余復交刃以閏荷矜為兵裂裳為旗動萬
為羣以殺為嬉公往兵之小大百戰殲厥渠魁執俘以
獻惟昔閩越文物皇皇何于斯時大肆獷狂盖有所恃
地險而遠新造之邦未洽國典慨彼昏翬以干大刑幾
三十年嶺海始寧維公虎臣多著勞勩身犯矢石出入
瘴癘天子錫命副長萬夫傳子及孫世功弗渝白髮來
歸優游隴畝語其平生猶見材武惟公之墓滋水之陽

刻詩貞石威名日揚

元故奉議大夫國子司業贈翰林直學士追封范

陽郡侯輝勗公神道碑銘

世祖皇帝臨御中國思建百度以興文治至元六年乃命國師肇造新字頒布天下京師建國子學以教胄子外則州郡並置校官以教民之俊秀者又置提舉學教官以總之初以制校印符改用新字於是國家言語文字盛行於時而國師之功固不細矣當是時左右國師

以成其功者公之考文書努其一也新字既成遂由翰林應奉文字超拜直學士久之仍以學士出為提舉湖廣學校官召歸京師卒二子長曰呼哩中順大夫監漢陽府次即公也諱額森少敏悟世其父業年二十擢為國子教授諸生翕然信服不敢以少年易之歲滿乃遷助教又遷博士為博士凡三考遂遷監丞又拜司業累官奉議大夫公性謹厚其於教人孜孜不怠作成人材居多嘗考古書聖賢行事及歷代君臣善惡成敗可監

戒者譯以國言傳諸學徒故諸生服公之訓人人卓然
自奮思立事功非但誦習其空言而已公又依倣成均
之制定為學規下至米鹽筆札亦皆出納有法其所譯
潤諸書人爭傳之學國言者以得公師為榮至公大間
武宗皇帝親擇貴臣子孫數十人俾從公游仁宗皇帝
方興學校眷公尤深嘗曰此人極有學守不可使離監
學公亦泊然自守不變不退蓋自教授累至司業幾三
十年未嘗別遷他官一時臺閣名卿碩輔往往皆其弟

子或欲援公居要官者輒力辭曰是有命焉不可幸而取也舊制司業班列五品以公故特陞四品方欲進為祭酒而公不幸病卒矣得年四十有七仁宗深悼惜之累贈翰林直學士大中大夫輕車都尉范陽郡侯其子赤赤少傳家學知名公卿間出監解之聞喜黃之黃陂皆有惠政入翰林為修撰拜授經郎兼經筵譯文官擢拜陝西江南兩臺御史言事切直劾罷權貴數人歷僉江東湖南肅政廉訪司事進拜海北廣東兩道副使按

行郡縣風采肅然今官太中大夫湖廣行中書省左右
司郎中嗚呼國家自建元以來號稱治平迄今七十餘
年矣京師公侯大家當貴赫赫而興替消長於歲時旬
月間者何可勝數而公父子三世獨以文雅清慎相繼
顯聞不亦盛乎公曾文父以上世仕高昌自其考始入
中國還家京師母巴哩納追封范陽郡君公配額森德
濟繼巴勒德濟俱追封范陽郡夫人子男一人赫赫女
三人適侍正府知印達爾瑪河東廉訪副使嘉琿河南

行省使都事拜珠孫男一人曰保堅女二人幼公以延祐六年六月二十三日卒以先塋地隘權殯都城西佛寺元統元年十月庚午葬宛平縣香山鄉七園里銘曰皇有中夏百度維作人文昭宣臣民允若乃興庠序敷揚國言公為之師五行其傳有來貴游執業抑抑郡材斯興以贊皇國公居函丈三紀如初佩服古訓衣冠舒舒咨爾國人榮達滾滾文字之澤獨克悠遠公又有子家學是承歷游清華令譽日升思美公度式表貞刻尚

其來裔是效是則

亞中大夫山東道宣慰副使致仕張公墓誌銘

公姓張氏諱克忠字彥直至元中由東官宿衛出為蠡州判官擢遼陽行省都事入為宗正府員外郎以親老乞歸養久之調廣平永年令歷明州信州路推官遷知言州事再遷和州以年老遂致仕即拜山東道宣慰副使累階亞中大夫泰定三年九月九日終於家年七十五公為人惇厚篤實遇事果於有為初佐蠡州歲飢民

起為盜公出米為糜以食餓者於是吏民以公故相繼
出米所活數千人盜亦哀止諸王叛東土詔遣大臣部
諸將兵討之公時居遼陽幕總督軍餉無少闕居民流
亡失業者公撫緝完復東土以寧永年地號沃壤公下
車召其耆老語之曰治民之道在乎敦耕桑崇庠序廣
儲蓄而已農桑勸則無寒饑之苦學校興則知禮讓之
方儲蓄廣則亡水旱之虞矣在縣三年以治稱信屬縣
玉山誣民偽造楮幣獄具矣公疑而辨之民得不死繪

公像事之終身延祐丙辰關中猝有變聲連河東吉在窮絕山谷間民乘間欲為盜公下令禁止盜禁不發旁州官屬為不法者憲司檄公往治之而訟獄積歲不能決者亦以屬公皆決治如法吏民畏服公所至大興學宮延師儒以教化為本擇良民子弟開敏者補諸生為除其繇役以故民學者衆而風俗亦或少變為和州歲旱公出禱輒雨歲則大穰乃繕治之廨舍及神宇所當祠者財用甚省而堅完可久和州人縫掖者艾偉公治

行以狀薦於部使者部使者以其狀聞於朝而公年已七十矣曾祖諱廣伯祖諱仁仕於金考諱辟皇贈奉議大夫知趙州事驍騎尉高邑縣子妣王氏贈高邑縣君妻楊氏封高邑縣君子男二人蚤從仕郎籍田署丞次某張氏世家中山葬新樂縣儀臺原自公祖以下始葬安喜縣堯坊原公之卒也從葬堯坊之北初公以材敏侍東宮一時宮臣後多貴顯至大官獨公出治州縣計資而升未嘗肯妄進取入官五十餘年而歸老焉其庶

退有足嘉者故為之銘銘曰

張望中山考厥世奕漢北平文侯裔烈烈行成輔唐帝
華胄相承尚克系溫溫和州庶以厲秉旄懷紱號良吏
至今郡邑有遺惠懸車來歸宛其逝圖銘元石識幽寯
更千百年庶無替

故奉政大夫遼陽行省郎中黃公神道碑銘

延祐四年六月吏部主事黃公肯播拜監察御史時丞
相特們德爾以受賕得罪匿興聖近侍家有司不得窮

治其事皆相顧無可奈何公視事謂同列曰丞相受賕之罪固所當治然其罪之大者盍悉陳之即率同列言丞相遠世祖制括江南地致汀漳民叛陰奪阿寶罕太師官致關陝弗寧降諸王監郡監縣致宗親不睦增江淮鹽課地稅致黎民固窮引用貪邪小人致朝廷政亂臺臣以聞天子震怒命罷相政事黜其門下用事者若干人由是公之聲名暴著中外而小人怨恨思害之矣明年春詔御史昌格偕公巡行上都覆實吏牘先時上

命建佛寺於雲州七峯山以太府丞大都監治大都者
平章某私人也上所賜軍匠金帛大都及總軍官悉分
取之軍匠訴於御史臺至是就命公等鞠之辭連平章
及其兄某二人方近倖寵任權勢赫然入言於上以公
等不思奉詔覈實吏牘乃敢沮格修治佛寺上性慈仁
奉釋教惟謹以其言為誠然即遣使召公等至京師止
官門外某傳旨責而遣之尋復以昌格及公知雲州事
俾董治佛寺以訖其工公下車惓惓以愛民為事少不

以遭禍自懲怠其事也郡當南北衝乘輿歲幸上都供
頓厨傳悉資於民公取之有制民不甚擾權貴官官過
其州聞公廉直亦不敢橫有需求值歲大饑穀貴民徙
公請於朝得米若干石以賑餓者其民至今以為德仁
皇賓天丞相復位向所黜門下之人悉召用之睚眦之
怨無不報者會使臣請修先朝實錄內外三品以上官
在皇慶延祐時除拜罷免賞賚責罰悉錄送史館符下
百司公具昔所得罪以聞相雅怨公思害之未得遂誣

公訕謗先朝言於英廟與昌格械至上都有司承望風旨謂公等不應言上而言上重坐以罪仍籍其家始知公衣衾圖書外他無所有公退伏田里漠然不以介意及泰定改元詔書凡特們德爾挾怨所構害者悉蒙昭雪於是始除公遼陽行中書省左右司郎中在官歲餘以疾卒泰定三年四月也其年五月葬錦州神水牛羣峪先塋之次公字允蓺其先齊人金初遷利州州南滿井黃家寨先墓在焉大安末又遷錦州其世系可稽者

懷安生昌昌生慶忠慶忠生果果生錦州儒學正居中
居中生開元路儒學教授獄是爲公考以公貴贈奉議
大夫禮部郎中驍騎尉義豐縣子妣劉氏贈義豐縣君
娶張氏封義豐縣君子男曰謙由國子生爲秘書監管
勾公少與其兄肯堂弟肯獲肯訥俱學儒公獨業成出
仕初爲錦州儒學正貢山北憲司書史轉燕南入貢兵
曹擢御史臺掾尚書叅政王罷早與公善累欲辟公力
辭不就遂補中書掾出官承直郎中書檢校官改吏部

主事出調雲南郡縣官人稱其廉還拜御史累階奉政
大夫卒時年五十八聞者莫不哀之公為人磊落明白
讀書務求大旨尤喜古人奇節偉行故其剛毅正直屢
與禍會而無悔昔者先君與公交契至深嘗同掾東曹
同檢校中書蓋道同而志合者也先君居秋官幕亦嘗
言忤權奸而幸無事然與公偕卒官行省郎中悲夫天
爵尚忍言哉今幸與謙得為同朝常相期勉以無忝先
世為事會謙以公之墓碑為請故謹序而銘之銘曰

偉哉黃公蚤以儒進植志不阿守道自信延祐天子清
明在躬思正百度丕變羣工爰有相臣陰險嗜利盜用
福威傷我聖治君門九重匪言孰通疇為耳目克廣天
聰公居其時執憲靡顧譴言正色彼罪斯著斥官外郡
數惠在民國述信史網羅舊聞彼為詆欺忍肆兇毒公
身可辱公名不辱惟昔世祖肇建憲臺孰去匪邪孰進
匪材列聖承之典則咸在人存斯興君子奚慨肅肅風
紀豈無正人云胡不淑以殞公身遼海茫茫碣石在下

太史銘之克示終吉

皇元贈太傅開府儀同三司康靖邢公神道碑

正議大夫光祿卿邢某既葬其父母偕丞相掾趙隆來
請曰維邢氏世家遼東吾祖忠定公當聖朝勦金之初
倡其鄉民來歸太師國王承制授義州行軍千戶撫綏
其衆不妄誅夷東人咸往依焉後以壽終先考康靖公
時方七歲祖母趙夫人以官授其族子先考既長恬忽
時榮不事進取奉母以孝聞及與人交慈祥樂易鄉閭

以長者譽之族子屢讓以官辭不取也元貞二年二月
十二日卒享年八十有一先夫人先十年卒年五十五
吾與二子承先世餘澤被遇仁宗皇帝給事禁闥命掌
膳羞酒醴日承寵光曾無數年致位列卿推恩之隆延
及祖考勅賜第宅並居京師念先世墳墓遠在遼東子
孫歲時不克展省今買地於京師城之南燕臺鄉契丹
里作為塋垣樹列翁仲石儀以元統三年二月十九日
舉先考及先夫人之柩葬焉願為銘文刻諸石昭示寵

光於無窮嘗讀周官酒正掌酒之政令以式法授酒材
辨五齊之名三酒四飲之物以供祭祀之物賓客之燕
享而酌數獻酬皆合其度酒正之出日入其成月入其
要歲終則會益古昔王者畏天恤民經德秉哲罔敢暇
逸崇飲故掌酒之政嚴慎若此我國家自世祖皇帝肇
建官制命宣徽光祿以司膳羞酒醴凡郊祀宗廟朝會
燕享則供奉之故必勲舊世戚親密近民始得與焉而
邢氏父子兄弟遭時治平皆愿謹自持上結主知迭膺

是選非朝廷恩寵之隆祖考積累之厚何至是歟謹按
忠定公諱鼎昌特贈推忠佐運功臣太保金紫光祿大
夫柱國魯國公謚忠定配趙氏贈魯國夫人康靖公諱
璉特贈太傅開府儀同三司上柱國魯國公謚康靖配
張氏贈魯國夫人光祿初事成宗皇帝得在宿衛大德
十一年擢成務郎禮部員外郎歷尚食局大使尚飲局
提點皇慶元年超太中大夫宣徽院判官嘉議大夫秘
書卿出為大寧路總管召拜光祿卿娶張氏封魯國賢

淑夫人子男三人長曰薩里由近侍擢奉訓大夫嘉醞
局提點加朝列大夫又加中議大夫典瑞少監遷太監
卿會陞監為院就拜典瑞院使官資善大夫改侍儀使
轉光祿卿出為山東道宣慰使卒次曰哈珠起家中憲
大夫詹事院斷事官遷嘉議大夫侍儀使擢工部侍郎
卒官通議大夫光祿卿次瑪摩今宿衛內廷銘曰

於赫皇元登世隆治累洽重熙涵育成遂爰有臣鄰左
右帝廷富貴尊安遭逢顯榮推本其先載德弗耀否極

而亨實乃天道桓桓忠定乘時奮揚好生止殺保其鄉
邦康靖承之辭祿而隱篤生孫子榮達衮衮國有大事
祠享會同牲牢酒醴用或不共帝念其勤晝日三接華
要卿胄父子就列上公封國節惠褒章爾宗爾先耀其
輝光顧瞻遼東鬱鬱封樹遠莫至止歲祠永慕龜食惟
吉改卜新原刻丈墓石永昭國恩

元故僉浙東海石道肅政廉訪司事甄君墓碑銘
今上皇帝以至順三年出居靖江侍御僕從多弗克從

時則有若廣西元帥府都事甄君世良左右承事克盡
恪恭明年皇上入繼大統遣使召君入朝未幾御史臺
奏為山南道廉訪經歷將行上不許改通政院都事無
何擢拜監察御史出僉浙東道廉訪司事至元元年九
月六日遇病終於金華官舍二年六月丁酉葬真定縣
大安鄉曹家疇北原甄氏世為真定人君祖諱全字賢
卿蚤歲業儒既長習律今年四十餘游江南會朝議用
儒士補郡縣吏浙西提學以君名薦遂補慶元路掾曹

進擢浙東西憲司又進南察院文宗皇帝方居建業臺
臣御史皆得進見君從御史按事廣海入辭潛宮上識
其貌問其姓名尋貢中臺天歷元年文宗入正宸極下
詔固讓明年明宗皇帝立於朔方勅省臺分官奉寶璽
北迓君從御史在行上閔其勞特除廣西道廉訪知事
在官歲餘調元帥府都事際遇今上疊承寵命搢紳以
為榮君恒思報效而不敢自伐君為人質實謹厚不與
物忤初使廣海御史務為苛察以釣名聲君隨事止之

其在靖江親視省上服用數奏甘毳食物調護聖躬夙
夜無懈蓋豈務豫知天下之福而傲其報哉上時燕閒
喜親翰墨大書賢卿二字以賜及遷浙東上憐其貧又
賜楮幣五千緡仍諭君曰浙東汝嘗巡行勿以為遠其
恩眷類此君享年六十有八初娶李氏延祐二年九月
卒年四十七贈宜人至是合祔君墓繼室洪氏封宜人
子男曰英內察院書史曰蒙常熟州吏女適郡人李惟
柏孫男五人思明思聰思溫思恭思忠銘曰

於赫聖皇神明之胄往居南土天篤其祐既踐天位如
日當中照臨覆幬六合同風尚念從臣式懋勞烈匪朕
爾私庸表臣節抑抑甄君人曰遭逢進司風紀昭明有
融惟古哲王舊勞於外亦有臣隣左右翼戴咨爾多士
負奇蘊能或命不遇卒老於行何獨甄君膺是榮寵爰
述銘詩光賁丘壠

元故鷹坊都總管趙侯墓碑銘

維趙氏奉聖州砦山人天兵入中原侯之祖考以易州

總押都統帥民十萬來歸遂拜鎮國上將軍都元帥易
州軍民太守始家易之涑水尋詔拔降民三千七百爲
獵戶別置鷹坊總管府司之仍錫元帥金符兼領其職
元帥卒元子守贊嗣守贊去爲他官侯之考府君嗣府
君卒侯嗣之侯之爲總管也廉以律已嚴以禦下歲時
蒐獵進貢有常而民不擾經行所部民相率爲酒食遮
留侯未嘗一入其家下至胥徒部屬趨其約束亦不敢
生事病民居官二年引疾免歸民念之不忘侯卒之三

年猶子棣州判官酒道安奉狀請銘侯墓昔者國家草昧之初南北未一政教未洽常因畋狩以講武功故鷹師之職貴幸隆寵承平既久猶恐武備寢弛或者不究其意馳騁豪縱因為奸利民始不勝其困矣若侯行事可不銘乎侯生世家喜狗馬射獵既長聞容城劉公號稱大儒燕趙多士咸往授業侯亦趨函丈執弟子禮劉公告以聖賢之訓歲餘盡去豪習故相何公瑋數稱其賢國初兵荒之餘元帥度田數千畝分賜諸子以給衣

食侯守先業不墜種木千章歲計益饒然自奉清約唯
務賑施貧乏趙氏宗族既盛官學四方或不相聞侯移
書俾歸省元帥墓庶幾古人合族之義焉其貧不能歸
旅殯他州不克葬男女昏嫁及時者侯給錢皆有差先
世丘隴在礬山者侯復鏤石表之列樹翁仲令子孫不
忘其處嗚呼侯行事若此才不滿用識者惜之侯諱密
字仲理祖考諱柔官至金紫光祿大夫河北西路兵馬
都元帥贈天水郡公謚莊靖妣張氏贈天水郡夫人考

府君諱守政鴈坊都總管又以長子允貴贈同知保定路遂州事妣王氏今吾衛上將軍義之女追封宜人侯初娶范陽劉氏早卒獨居奉親幾二十年萬戶廉某聞而賢之以女弟歸焉夫人出大家有賢行亦先侯卒有男二人女五人男曰伯仁隆祥使司宣使其次伯輔庶也女一適翰林國史院檢閱官進士廉方二在室二天侯享年七十有四以元統二年二月某日卒伯仁舉侯之柩於其鄉五峰山次元帥之兆葬焉銘曰

有美趙侯生於華族年富力强狗馬馳逐長知問學出
親師儒刮磨豪習衣冠舒舒涖官臨民不忤不戾至今
其民懷慕遺惠推原爲政蓋本諸身賑施孤窮九族日
親聖治百年洽於中土文恬以嬉猶不忘武王公將相
蒐畋以時車過侯墓尚徵銘詩

武畧將軍河南淮北蒙古都萬戶府千戶武君墓
碣銘

國家隆興朔幕中原豪俊奮其材勇起應以兵時方急

於得人無遠邇親疎之間故能克成武功混一華夏今
觀武君功行之實則國初用人之盛尚可稽焉君諱展
占河南蒙古軍籍以驍勇從其主帥南征署帳前百戶
躬冒矢石直前無避主帥承制授行軍百戶至元庚午
從攻襄陽南隆洞又從攻安慶黃龍洞戰績居多進行
軍鎮撫甲戌渡江有功賞賚甚厚陞四翼漢軍千戶宋
之亡也揚州堅守不下大兵臨之君率士卒分守要害
未幾調監郡武光澤縣版圖初入政令未洽或相率起

爲盜君出奇策獲渠魁戮之釋脅從者不治民大感服
連帥表於朝制授管軍千戶錫銀符已而金坑賊作衆
號數萬君從行省平之有功加武畧將軍河南淮北蒙
古都萬戶府千戶錫金符癸巳卒享年若干夫人楊氏
子男三人長曰德贈武畧將軍襄陽萬戶府千戶飛騎
尉西平縣男次曰托音曰可畏支出也德沉毅有謀畧
不幸早卒孫庭璋庭玉俱幼托音權嗣其官托音卒庭
璋嗣方其幼也楊夫人親鞠育之稍長從羣兒授詩書

於鄉校羣兒未達庭璋能通其義楊夫人曰汝祖將蒙古軍征伐以有今官汝父早亡汝當襲爵今以蒙古名命汝庶不忘授官之所自也由是以小字蒙古台行天歷之初京師調兵以禦北軍庭璋被檄巡視檀薊諸隘人多觀望庭璋獨戮力所事而不敢怠事平進官忠顯校尉曾孫男九人曰息曰謚曰諤曰質曰毅曰庸曰義曰忠庭璋之子也曰衡庭王之子也女三人適蒙古軍彈壓謝某千戶范某百戶達哩武氏本隰州隰川人徙

家汝州梁縣葬縣東某鄉某原今戍滑州白馬云銘曰
矯矯武君奮身戎行進長千夫材武洸洸濟彼淮江又
抵閩越分將國兵克著勞烈再傳其孫遭時無虞學古
儒將佩服詩書思表先德垂示孫子汝水淵淵其流無
止於皇國初圖治須材無間戚疏羣士鼎來立賢無方
古有明訓述此銘詩屬爾豪俊

滋溪文稿卷十五

欽定四庫全書

集部

滋溪文稿卷十六至十八

詳校官庶亨_臣 陳若霖

中書_臣 劉源溥覆勘

總校官進士_臣 楊懋珩

校對官中書_臣 范鰲

謄錄監生_臣 周桐

欽定四庫全書

滋溪文稿卷十六

元 蘇天爵 撰

碑記

高邑李氏先德碑銘

至順二年春兵部侍郎李公思明擢太禧院斷事官是冬遷戶部尚書明年拜陝西行臺治書侍御史元統元年調江西道廣訪使二年召為工部尚書又除大都路

總管歲餘拜中奉大夫江浙行省參知政事於是推恩
褒封先世大父翰林直學士亞中大夫諱平加贈嘉議
大夫禮部尚書上輕車都尉隴西郡侯考嘉議大夫禮
部尚書毅加贈中奉大夫河南江北筆處行中書省參
知政事龍軍隴西郡公祖母宋氏母隴西郡君王氏並
追封隴西郡夫人公得告北歸謂郡人蘓天爵曰思明
少讀孔氏書起家試吏列官臺省致位光顯鴻恩褒命
施及考祖思明何有焉今將樹碑先墓以彰朝廷之寵

光以表先世之潛德子其爲我銘之謹按李氏其先太原人公之曾祖府君諱成金季避兵入趙之臨城山中生四子長即郡侯次曰鵬曰弘曰榮艱難鞠育皆克有成府君既卒兵復至各逃難解散弘榮被俘郡侯物色百至卒不能得後聞弘榮俘雲朔間復往求之竟出錢贖還中統初元中土已定乃自臨城遷居高邑因著兵籍遂葬府君於縣之新豐鄉管材原頃之有詔調兵戍襄謀伐宋郡侯亦在遣中宋亡始歸而弘榮別占民版

先是勅凡民已著兵籍別入民版者罪之或勸當訴於官郡侯不可曰爲兵雖勞寧獨任之忍令吾弟罹於罪乎至元十四年卒年八十六二子長曰訥次即郡侯公事母以孝聞治家儉勤宗族雍睦公仕於朝欲迎養不許曰吾不忍離鄉井邱隴也公既貴顯未嘗喜見於色惟教以清慎持身忠實事上春秋既高益自謙恭里人感化其德郡邑牧宰歲時存問必造其廬曾無一事干焉泰定四年卒年七十二鵬二子曰旺曰琪弘四子曰

威曰輝曰某曰某訥之子二曰信曰德郡公之子二長
即公也次曰思敬公之子二曰庸曰讓俱補國子員思
敬之子二曰允曰權允補宗仁衛譯掾公初由丞相西
曹掾爲壽福院都事歷府正司典簿工部主事大都留
守司都事山北憲司經歷戶部主事河南行省員外郎
陝西行臺都事刑部員外郎御史臺都事遼陽行省郎
中山北道廉訪副使遂爲兵部侍郎公爲人質實自信
未嘗矜智飾名居官臨事毅然有守其爲山北經歷也

先時有誣告大寧路官不法者逮繫三十餘人久之獄不能具憲長傳致其罪公至閱其獄辭不可而止泰定間丞相都爾蘇當國其黨與有坐貪墨者時車駕在上京公以都事往奏其事丞相怒欲沮之萬方中書參政楊庭玉亦以官市錦受賕事覺詞連丞相壻大都路治中某丞相請令臺省宗正鞠之臺臣以爲世祖立制官吏貪墨者唯令臺憲劾治之今曰與省宗正共之是違祖宗舊制也上請者七不報公辭歸京師臺臣復聞始

可其請庭玉等款伏當治其罪丞相急奏貸之弗及於是益怒會御史封章言天下水旱貧民流徙皆樞機之臣不能調變贊襄所致丞相取其封章入言曩者拜殊特寬寬言論異同構成國禍今御史誣詆大臣惑亂朝政當置獄鞠問乃矯勅令諸王省院宗正雜治中丞侍御史皆下獄及無所得遂以臺臣損益御史封章奏聞爲罪公曰是皆某等之責臺臣無與也辭氣奮激衆皆聳聽都爾蘇屢奏誅之賴天子知其無罪不允復自請爲

御史大夫奏釋其事公退歸田里泊然不以介意丁內
外艱治喪以禮由是聲名益著朝廷連拔用之其在戶
工二曹力能正其錢穀濫出者嗚呼祖考積累於其先
公承於其後碩大顯融爲時聞人是宜有銘以表見於後
世銘曰

李氏徂遷肇自太原畜其善慶以貽後昆維茲後昆益
大以顯迺本厥初流澤日遠於皇建官式放漢唐中書
憲臺綱紀四方公才而賢揚中厯外細不必陳當錄其

大在昔秦定有臣擅政虐焰爍天百僚震悚公於是時
執憲在庭風采列列姦諛是懲彼騁其威我勵其操若
金勿渝如木不撓退安田里華聞彌彰帝嘉其直登用
日光尚篤其先璽書褒賚匪徒褒之用勸在位自晉人
臣顯親爲孝數備禮登以有先廟維今之制樹碑新阡
銘詩孔昭百世其延

楊氏東塋碑銘

楊氏爲著姓舊矣其家真定由東鹿徙推本世次鹿城

翁某生總管成總管生嚴齋君義嚴齋生從仕郎靈壽
縣尹昌榮縣尹生應奉翰林文字承事郎同知制誥兼
國史院編修官俊民凡五世元統二年夏縣尹遣人持
先世事狀謁銘於天爵曰吾家葬真定郡城東秦家里
先考不幸客死江淮先妣無恙時嘗曰楊氏塋域弗廣
禮當別兆祖宗神靈安此殆且百年未易改卜汝父
初配已葬兆域吾老汝其別爲我營葬郡城西栢堂原
今將卜葬先妣念先世墳墓尚無文字以表其潛德敢

請天爵少與俊民同門學今又同執筆太史鄉閭故家
遺事固所喜聞而樂道也謹按鹿城翁爲人孝謹慈祥
金季播遷南踰河以先隴睽隔歲時不克展省遇祖考
忌辰悲哭彌日因號鹿城以示不忘鄉井平居無疾言
遽色蓋溫然馴行君子也年八十餘而卒總管字道原
早歲嗜學有志事功值時多艱抱器弗售歲壬辰北渡
河僑家真定郡新創於兵民無屋宇乃寓僧舍親終悉
力以營家壙手植松栢孝聞遠邇歲丁巳遂占戶版隸

劉元帥織局時官制未備元帥廉君有守因命董匠家稱總管君分功授法歲獻其程已而朝廷所設官至君退就匠列織組謀畫家咸咨焉殖家清儉童奴年出四十者皆良之曰均人也獨可久役乎春秋既高命構崇屋繪孔子老子像祠之間集幽人誦說道義以俠道焉卒以至元八年三月年七十三其配尚氏李氏王氏俱開封人尚氏沒於兵李氏卒年四十一王氏卒年八十五生五男子曰和曰元曰義曰律曰某和字和甫性好

簡靜和樂世不偶充然自樂以終其身大德八年八月
卒年七十七配任氏生子三人珍定用元字元甫個儻
不羈聞江南佳山水輒往遊焉至元二十五年六月
行次江州卒年五十五橐殯彭蠡湖側配王氏義字義
甫嚴齋君也丰姿雄偉弱不好弄寡言笑長入鄉校師
友異之母既早世奉繼母以孝事兄尤篤里徭門役已
獨任之治家嚴栗閨門肅然凡與人交始卒一敬曰歡
狎者交絕之媒也嘗遇相者戒君不可遠出出則事巨

測也及兄訃至即日戒行或以相者言止之君曰兄亡不奔赴可乎至則兄墓已淪於水君居踰時哀慟無已鄉人見而憐之援君同歸過淮易舟君以舟槩別僦一舟而鄉人差在前訝其後訊之莫知所在至元二十六年二月也年五十五相者之言果驗縣尹徒跣奔涉江湖衝冒風濤物色百至竟不能獲久之作木主即淮濱迎神以歸君初配王氏前卒繼室張氏有賢行生男四人全昌榮顯允德秀孫男十人逸民殷民友民獻民懷

民中民信民黎民斯民其一俊民也皆讀書業儒俊民
登至順元年進士第知名於時銘曰

燕南趙北有城我我上峙恒嶽下瞰滹沱山川炳靈將
相焉出亦有清門世業儒術敦行孝友蘊德於身身焉
弗彰燾及後昆有美孝孫溢於翰墨射策王廷思報皇
圖昔在炎漢揚世顯融雄爲巨儒震官三公天懋其功
克衍厥後衣冠相承嗣有賢胄真定之宗來胤日隆顧
瞻東原封樹是崇維古公侯必復其始碑以表阡匪華

桑梓

寧晉張氏先塋碑銘

昔至元中寧晉有名公偉人故按察使王公忱參知政事王公椅廉訪使荆公幼紀宣尉使陳公祐及其弟御史中丞天祥皆以風節材猷聲振當世天下想其風采況居同里閉世通婚姻覩其流風遺俗者與大中大夫順德路總管張侯世家是邑間來請曰公爵非材承先世餘澤及鄉黨耆舊之訓粗有樹立由樞密丞相掾官

工部主事歷行陝西省員外郎儲政司議中書左書司
都事工戶兩部郎中僉山南廉訪司事行河南省監察
御史都遭運使政牧順德推恩褒贈祖考將刻石先墓
以彰朝廷之恩渥以爲鄉井之光華子其銘之按張氏
初由臨城徙兆寧晉寧金符鄉於臺里侯之高祖府君
某值金人南徙河朔盜起偕里人避崛室中盜索出之
歷問何有衆不能對殺之府君遺盜藏衣一篋遂獨得
生配郝氏一子曰林值天兵入中原率衆來歸歲乙未

著籍民版配王氏慶源軍節度副使王之女弟按察使
忱之姑也一子曰山殖家儉勤見僮僕棄粟於地必挽
拾之曰農人終歲勞苦汝何不念之乎大德十一年五
月卒年八十五贈中順大夫禮部侍郎上騎都尉清河
郡伯配姜氏封清河郡君一子曰善讀書業儒不事進
取奉親教子克孝且嚴積粟於家賑施鄉鄰之貧者里
有惡少獨畏其行而不敢犯初封從仕郎卒贈奉議大
夫知趙州進朝列大夫同知真定總管府事加贈翰林

直學士亞申大夫輕車都尉河清郡侯至治三年十月
卒年七十九配劉氏累封清河郡夫人生子四人公弼
公憲公佐季即侯也始官工部董修大內文武樓諸侯
王邸白海柳林行殿材用減省而堅完可久泰定間京
畿雨水關陝大旱民皆告飢侯承詔賑之所活無算至
順初都事左司時相請給西域賈胡中寶鈔若干萬定
侯曰空府庫以私黨類明詔所以誅姦臣也今復欲效
尤耶太史上言國有禁忌四年不當興土功時中書方

請爲左相起甲第侯復官工部獨曰民間營建尚卜吉日矧咎徵在國家臣子忍爲之乎僉憲山南斥豪民之武斷鄉曲者及拜御史從畋柳林久未還宮即拜疏言聖躬櫛風沐雨當以宗廟社稷爲念遂命罷獵順德方旱侯下車即雨歲則大熟公弼之子二曰珪國子員曰瑁公佐之子二曰璟曰璞都水奏差侯之子二曰璉國子廟學管勾曰琦女孫適真定路司獄王德工部奏差蘇良臣司農司管勾鄧宗禹中書省宣使王蒙蒙即參

政琦之孫也獨公憲早世其子亦夭妻劉氏守節自誓
年踰六十有司登名於朝旌其門曰貞婦云趙屬邑七
寧晉最下衣冠鄉士接武明時表率風厲其人者多矣
張氏累世不顯至侯始大閨門之中亦貞順有禮表而
銘之豈第爲一鄉勸哉銘曰

太行之東大陸既作列爲郡邑民物旁磻皇有中夏稽
古建官至元隆盛聿多賢材叢爾寧晉故家遺俗風動
不應善斯可續侃侃張侯學傳父師克奮材能以究厥

施民無恒性習俗日下樹以風聲不善者化漢有王烈
行義孔彰鄉名君子邦家之光自昔有國賢材是進表
率之機惟祇惟慎咨爾張侯克紹前聞來者興起尚觀
斯文

真定杜氏先德碑銘

至正紀元春二月大中大夫廣平路總管杜侯均以祖
考封爵請於朝踰月制下祖信贈中順大夫中山知府
上騎都尉京兆郡伯考瑤贈大中大夫順德路總管輕

車都尉京兆郡侯侯將樹石表於塋兆乃錄先世所藏
故國誓書譜謀傳誌屬天爵爲之銘維杜氏世家真定
故宋昭憲太后之族建炎初宋人南徙有留居柘城者
曰宴之宴之生繹繹生思義思義以材武爲萬夫長金
亡北踰河至臨洺鎮卒焉夫人李氏挈其二子歸真定
長即中山府君爲人篤實不欺河朔旣平治生益裕每
因事導人以善鄉鄰化其德至元九年六月卒享年六
十有一其配京兆郡君李氏元貞元年八月卒享年七

十有六子男四人仲即順德府君丰姿高爽所交皆一時名流性喜施與人有緩急赴之唯恐後其才長於理財不卑小官歷監中山濟州廣平清江稅民不苛擾而額亦溢將老以承務郎右八作司提舉致仕享年七十有三至治三年十二月卒其配京兆郡夫人賈氏享年七十有九天歷二年七月卒子男均也女適承直郎德興縣尹李權孫男壽國子員曾孫樞楷楨中山府君之弟靜二子曰珍曰萬順德府君之兄曰瓊弟曰瑛臨水

鐵冶管勾曰琮仕之顯者侯也侯以葛城縣尹擢丞相
東曹掾轉太府利用兩監經歷廷議以廣東海舶病民
命侯罷之悉收舶貨入官一毫無所取改承德郎萬億
綺源庫副提舉遷奉直大夫灤州知州政教修理人懷
其惠陞中順大夫嶺北行省左右司都事佐其省臣分
給邊民錢穀郊王嘉之與以名馬進拜廣平路總管侯
之遠祖諱蘊蘊生琬琬生爽爽生仕周爲宣徽南院使
五子審琦審玉審瓊審肇審進女歸宣祖是爲昭憲太

后后既貴蘊太保琬太傅爽封陰平郡王尋加太師其
後蘊累贈太傅封平原王琬太尉西河王爽中書令仍
以爽有佐命功俾從祀景靈宮又賜誓書護其家審琦
事後唐爲義軍指揮使子彥超西京作訪使審玉早卒
贈中書令審瓊富州刺史贈太師中書令諡恭僖子彥
珪饒州刺史贈太師中書令彥珪子守元梧州刺史審
肇左武衛上將軍檢校左僕射贈太傅昭信軍節度使
諡溫肅子彥遵南作坊使審進保義軍節度使累加太

師開府儀同三司贈中書令諡忠惠追封京兆郡王子彥
鈞彥彬彥鈞密州觀察使贈安化軍節度使子贊文供
奉官贊寧殿直孫宗壽三班奉職初平原西河兩王葬
真定東南臨濟原石儀皆具至恭僖公陪葬安陵溫肅
公賜第京師子孫徙家開封請以昭憲故第度僧居之
勅名臨濟禪院尋改奉慈蠲其稅役俾守墳墓久之溥
沱大水墓皆淪沒元符二年平原王裔孫常由吏部侍
郎知成德軍訪求塋域得仆碑翁仲於臨濟沙中而封

植之金天會八年陰平王五世孫通直郎權萊州軍州
事欽兵後構得王之遺像復修家譜分遺宗人藏焉自
後臨濟屢有河患先墓遂失其處國初中山府君改卜
塋兆於真定西北三家原嗚呼後唐至今四百餘年凡
三易代衣冠遺裔泯滅無聞而杜氏獨能傳緒若此天
爵昔列詞林獲觀宋史稱杜氏世以積善聞鄉里陰平
王所至民立生祠昭憲遺言以天下務重不可暇逸四
海至廣當立長君茲其慶澤深厚詒謀晏寧而其家賴

之能久遠歟故謹爲之銘曰

惟杜受氏陶唐其始漢周延年徙家西京再世執憲益
弘厥聲畿魏傑射弼齊衛尉雲仍和和接武元魏三世
持節嗣守常山遺愛在民有若世官平原西河蓋其華
胄女輔宋室丕正傳授積善之慶鄉閭允聞四世王封
澤流子孫浚都陵夷衣冠孰在陰平遺苗及今益大出
贊省幕歸領郡符人思其惠王善其謨寵命褒章賁及
祖禰德澤淵淵方來無止歸視其家故謀猶存惟昔先

世簪紱盈門爰樹封碑以表世德淳沱安流永衛封殖
元故贈亞中大夫東平路總管李府君神道碑

亞中大夫彰德路總管李侯來請曰伯敬早承先訓粗
有樹立踐駁中外官第三品朝夕恒以不克顯親揚名
爲懼今聖澤汪濊贈典光華先考府君既錫寵章焚黃
告於墓次然神道之石猶有未刻惟執事幸賜之銘則
府君孝德懿行庶可以垂示於後世矣按府君諱註字
才卿少奇偉有志節甫冠遊京師適裕皇正位儲宮世

廟命選故家子以備宿衛府君以才敏在選中出入蒐
政無不從行至元十年裕皇始授冊寶而左右之人多
以年勞得官久之大司農臣請於京畿之南新城定興
之境建立屯田分命中原及江淮軍士樹立五穀以實
軍儲制可於是置總管府以涖之分立諸署以治其事
比及三年墾田若干萬頃而倉庾委積如坻如京矣府
君由宿衛爲萬盈署令在官數年治效居多會劉守段
貞奏立虎賁衛以掌屯田而總管府諸署皆罷府君於

時方強仕也以母年高輒家居不出躬奉事之甘旨滫
瀡克盡孝養母幾九十以天年終喪葬如禮孝行聞乎
郡國而侯時已入官府君益不肯仕又十餘年以疾卒
於家享年六十有五至大元年正月八日也娶楊氏易
州太守某之女有賢行前府君二年大德十年三月十五
日卒享年六十有三子男二人長則伯敬次伯顯女一
人適棣州管民提領張某孫男曰某女長適承務郎南
陽府判官左括次適史楫府君初贈奉訓大夫同知中

山府事飛騎尉新城縣男加贈亞中大夫東平路總管
輕車都尉隴西郡侯楊氏累封隴西郡夫人府君曾祖
考諱忠仕金知黎陽縣祖考諱璋興定中以驍勇擢水
軍萬戶佐高陽公張甫守信安屢出奇兵戰燕趙之野
金亡始殞其身考諱天祐初以父死國事隱於易之西
山事定出謁萬戶張忠武王柔忠武器其材導之入覲
命爲新城縣尹時天下初定披荆棘立官府築居室以
招流亡闢田野以務稼穡布政以養民興學以訓士居

官十有三年而終民懷思之不忘贈中順大夫中山知府上騎都尉隴西郡伯配張氏封隴西郡君侯元貞初宿衛內廷久之中書奏爲尚乘寺屬厯太史院經歷儲祥都事外補則爲同知慈利州事建康路總管府判官知衛輝之淇州又知保定之安州遂遷彰德總管淇州之政民尤稱之方泰定乙丑河北大水無麥禾民無以爲食侯首捐俸以倡富人共爲出粟得二十餘石分給貧民以是民無死徙者明年夏大蝗淇之西北鄉有蝗

生焉侯齋沐禱於浮山八蜡祠至暮有羣鴉飛集食蝗
皆盡郡人神之又明年河朔大旱侯禱於靈山龍祠者
七每禱輒雨歲用豐稔民有訴弟毆已者同列欲置於
理侯曰是某等不能敷宣教化所致名而諭之曰汝兄
弟之身俱父母之遺體奈何以小忿傷父母之遺體乎
其弟感涕友愛如初雷氏女訟鄰女詈已侯令里長諭
之曰鄴下風俗不可長也郡有豪民爲猾惡以亂史治
侯痛繩以法或改行爲善侯清慎有守年六十餘即致

仕而歸少嘗接見先朝故老誦其言行甚習蓋溫然循
行君子也維李氏涿州范陽人後徙雄之新城自隴西
郡伯以上葬縣東南歸信鄉柳林莊府君始葬其母隴
西郡君於縣北嘉禾鄉板築里遵遺命也而府君亦從
葬焉嗚呼昔者貞祐之變金人南播兵燹之餘中國衣
冠舊族存者無幾而新城李氏祖孫相繼百五十年官
學不絕非積善累行之久能至是歟銘曰

猗歟府君允爲吉士生際明時胡不祿仕歸休於家事

母孝恭晨昏甘旨罔有不供母終天年喪祭以禮鄉人
嗟咨咸曰孝子燕趙之野有川有阿士生其間慷慨悲
歌世代既遷風俗斯易王化熙熙樂我聖治維昔李氏
進長萬夫驍勇桓桓殉國捐軀溫溫府君克奉其母忠
孝一門輝映今古國有卹典錫茲侯封墓門之南有石
崇穹爰勒是詩式表懿行惟爾子孫尚嗣其慶

元故廣寧路總管致仕禮部尚書李公墓碑銘

李氏由燕之霸州寓家河間今居京師三世矣公諱羽

字翼之大德中從事省曹擢吏部掾轉掾宣徽就除架閣庫管勾階承務郎久之調同知南陽府唐州事選爲左八作司提舉進奉議大夫兵馬指揮使改度支監丞積官大中大夫廣寧路總管歲餘致仕而歸遷正議大夫禮部尚書享年七十有四至正四年正月二十六日卒贈上輕車都尉追封隴西郡侯諡靖敏越十日葬大興縣燕臺鄉大市莊之原以元配隴西郡夫人王氏祔夫人前公十年年五十有九卒繼夫人郝氏祖考諱成贈

中順大夫中山知府上騎都尉隴西郡伯祖妣呂氏隴
西郡君父諱仲謙累贈太中大夫永平路總管輕車都
尉隴西郡侯妣劉氏隴西郡夫人子男四彥敬奉政大
夫兵部郎中彥中忠翊校尉僕州判官彥通山東宣尉
司奏差彥德未仕女二適張某張某皆官族也孫男三
恒補國子員次恪恂女一我國家既有中土設都於燕
建立朝省考定官儀而錢穀律令章程非得明敏便給
之士不足以集由是四方材傑羣起而趨附之中外庶

官沛然足以充其用矣況如公者家居京邑又有適用之才凡在廷煩劇之司列郡長貳之任皆克舉之是宜有銘表著於世公早遊鄉校及長治文書省曹卓有立志而不跪隨欲顯名於當時故所主輒以敏給見稱吏部宣徽掌出納金穀餼廩錫賚之數尤稱浩穰公既從容辦治領宣徽者多貴近大臣善公之爲遂有管勾之命唐州地本沃壤兵荒之餘貧民不克佃作爲强有力者兼而有之民屢訟之於官而長吏貪其賂皆不爲理

公驗其契券稽其疆界悉歸之民未幾公丁內艱去官
民不忍忘公惠刻石頌之都城設公作司凡銅鐵髹漆
甕盎筐筥席箔繩索皆掌之以一司不勝其任故分左
右其繁雜不可勝原朝有營繕祭祀燕享畋遊飲餞不
時之需悉取給焉公既被選供其急未嘗乏用勤其職
不以爲勞及代者至則以故儲新斂按籍付之無一缺
者輦轂之下風俗雜而獄市繁兵馬使雖用擊斷然專
任以刑則網密而俗弊崇之以寬則威信不立公素明

習法令又適寬猛之宜而惡少稍知斂避不敢犯法以故囹圄數空大駕歲幸上都公卿宿衛之士扈從而還悉出駝馬分飼山東河朔以少者留京師度支即以芻料給之比歲或憚地遠恃貴幸多不肯行於是京師供給愈煩財用或不足矣公不恤怨議度郡縣遠近年穀豐歉皆命驅駝馬出之而國用亦少紓焉遂拜總管方施豈弟之政以撫乘人人亦安其慈祥之治而公年及七十矣此公之剴煩治劇因服官政可見者也非其才

之精敏過人能如是乎嗚呼有國家者嘗患人才之不足也或其才能而世勿克知或用之違其所長未究其蘊此所以世不獲盡其用民不克被其惠也若用之或宜其能或食焉而怠其事又豈造物者之所佑乎公蓋有濟時之才而不負其所用者也其壽考顯榮有子孫以善其繼豈偶然歟彥敬起家御史臺知班歷浙東西憲司照磨遷山南山東知事由江南行臺照磨爲中臺管勾擢陝西行臺御史改僉江東廉訪入拜監察御史

又僉山南憲司事進擢郎官是益克承先志益大其家者哉銘曰

奕奕京都郡才所趨用適其宜治効畢輸大則公卿其次即掾錢穀刑章有程有憲培克爲能苛察爲明苟知利己遑恤民生朝衣絳繅正笏束帶日月其除國政吳賴偉歟李公職思其憂中外踐更敷政優優事集目前雜沓膠輻䟽之剔之是究是度匪名之植而譽益隆匪利之趨而福是叢其福伊何天篤賢胄執憲愕愕風紀惟

舊克承克衍家用以興寵榮有光遭世治平京城之郊
有拱邱木刻石載文來者其勗

滋溪文稿卷十六

欽定四庫全書

滋溪文稿卷十七

元 蘇天爵 撰

碑誌

元故通議大夫徽州路總管兼管內勸農事朱公

神道碑

世祖皇帝既一四海思欲休息吾民命選良二千石以
牧養之成宗皇帝恪遵祖憲天下宴然一時守臣多才

能清慎之士若朱公者蓋其人哉公諱霽字景周泰安
新泰人也初襲父官為淮東大都督知揚州至元十四
年詔改都督府為總管府命公為揚州路總管兼府尹
官中順大夫佩金虎符二十三年改吉州路總管二十
五年遷少中大夫起為平江路總管元貞改元進階太
中轉台州路大德四年轉信州路十年遷嘉議大夫總
管衢州路延祐三年進通議改徽州路七年夏四月戊
午以疾終於官舍春秋六十有二凡七為郡守唯吉州

丁外艱不果赴其他皆有政績可紀公初爲楊州時甫弱冠已能習知民事治以簡靜民便安之平江力賦繁夥素號難治公寬其法制而民亦理或告嘉定富室王氏謀爲不軌羣議調兵捕之公曰是必姦人利其財爾遽從其言民將重足而立不得喘息矣且人孰不畏死奈何以罪懼之乃命邑令及千夫長一人潛伺虛實遂正誣告者罪會大兵航海征爪哇省檄郡給軍餉十萬餘石而風濤之險折閱之害吏民咸以爲懼公曰郡民

朱張二氏歲漕米海道可俾就輸充其常賦之數則公私皆利衆咸服焉公遇事敏給類此台州土不宜桑官歲征絲纊於民民轉市於他所公請止輸其直民甚便之或言郡產白金可以充貢行省命公行視公曰此作俑以害民者也力言無有議遂寢其他若賦役之苛鹹釐之擾纖悉委曲公皆爲條約以釐正之台人至今以爲德黃巖歲飢公惻然曰捄災恤民守臣職也俟報而發民無餘矣吾寧忍獲罪不忍坐視其民飢而死也亟

出官粟賑之全活萬人事聞朝廷嘉之海有劇賊數百
恣行剽掠舟人患之至是擒制渠魁同列欲緩其獄公
曰茲爲民患久矣孰忍容之遂置於理餘黨聞之皆潰
信州歲貢金幣金則私於吏手幣則掊剋於工民無可
奈何公親爲督視其弊始革先時郡即宋某官辛幼安
第爲稼軒書院國初戍兵奪而居之公歸其侵地新其
棟宇儼然列爲學宮矣衢之西南黃陵堰溉田數百萬
頃歲久弗治水溢爲害公曰此農政先務也庀工完之

是歲江南旱飢衢田藉堰灌溉獨獲豐稔民故無徙死者又修平山亭暇則率僚吏登覽山川林壑之勝而詠歌焉徽州歲貢紙數百萬皆賦細民民不勝困流移失所者衆公驗戶籍請以田多者賦之爲除其租中書是其言民害始息又葺學宮以教士子修郡乘以識風土郡人方樂其政而公薨矣我國家至元大德時方內悉平年穀屢登法制簡易公卿大夫往往多樂外官蓋有以也公治楊七年徽六年平江衢皆五年所至廉平政

理名聲流聞吏民愛慕豪強畏服齋閣靜深娛意圖史
蓋隱然承平官府之治焉比年朝廷軫念斯民數下詔
書選擇守令卒未有治化表表稱於時者豈材能不逮
於昔人歟抑或事有難爲者歟如公者誠不多見矣公
曾祖某祖森蘊德弗耀父煥累官中奉大夫福建道宣
慰使母夫人高氏配趙氏先公卒次管氏江西行省左
丞如德之女俱有婦行閨門以爲則趙氏未嫁有足疾
父母辭焉公卒行親迎之禮子男七人德懋德輝德容

德成德潤德明德寬皆以學行聞於時德懋溧陽州判
官德潤江淮營田提舉女七人適許謙葉珍陸鉉敬自
強謝庭芝管若鑑吳某俱官族也謙同知攸州事自強
安州知州孫男十三人道生道寧道安道興道定道清
道存道全道通道常道泰道元道堅女二十人公卒之
明年某月日葬某縣某鄉某原初宣慰公以雄材將畧
奮戎伍天兵渡江臨安已歸而楊州獨堅守不下及大
兵至郡守李庭芝戰不克遂棄城遁兵荒大飢軍民數

萬或相食制閭不能支民且亂宣慰公諭八郡吏民來
歸聖朝秋毫不擾淮人大悅近臣導之入覲世廟獎諭
良久錫賚甚厚公至元末亦嘗以事見馬上顧問周渥賜
西錦衣一襲嗚呼昔者江淮內附之初法制未立居官者
或肆貪暴以虐其下而公父子唯務施德布政惠活其
人其胷中所存豈不出於尋常萬萬哉宜其子孫蕃衍
衣冠相繼爲海內聞家天爵按部淮東道定適爲憲史
以公神道碑銘爲請故采其治行序而銘之銘曰

惟天生民弗克自又惟古建邦分吏以治吏治伊何允
維循良國用寧一民斯樂康於赤皇元奄有萬國爲官
擇人克奉其職有美朱公如古列侯慈祥愷悌敷政優
優四十餘年歷典七郡民歌孔揚肆有令聞在昔公考
材武桓桓挈爾萬衆易危即安燾及諸孫世秉詩禮蔚
爲聞家衣冠濟濟彼何人斯爲虐爲貪報施昭昭天罔
弗監泰爲公卿山或如礪銘詩不磨視此良吏

元故大中大夫大名路總管王公神道碑銘

至元六年冬十月丁酉大中大夫大名路總管兼府尹
諸軍與魯管內勸農事知河防事王公以疾卒於郡之
德教里吏民咸走哭弔明年至正改元正月甲戌其孤
子仁護公喪歸二月庚寅葬安喜縣仁樂鄉竒蓮原吏
民懷思不忘屬國子司業潘迪頌公遺愛於石仁來請
曰先子治行魏人已述之而神道之碑獨未有刻吾爲
子孫者稱揚先世之美庸敢緩乎按公諱惟賢字國寶
世家中山祖立仕金爲唐縣主簿皇贈亞中大夫廣平

路總管輕車都尉太原郡侯考王贈嘉議大夫禮部尚書上輕車都尉太原郡侯公少從鄉先生學長善書計遂遊京師擢戶部掾由宣徽入掾中書延祐二年詔大臣分賜諸王金幣於朔方掾屬從行者遷賞有差公與其選進官從仕郎工部主事未幾改戶部主事踰月徽政院選爲都事中書奏留之徽政復以爲請朝著由是皆知其材久之得告歸省父疾尋丁父憂廬墓鄉閭以孝聞服闕復爲工部主事轉吏部泰定元年擢中書左

司都事先時詔由吏出官者止從七品至是許至四品
公起遷五階官奉直大夫無何擢拜御史遷戶部郎中
庭議以公向嘗錫賚於邊復命偕重臣北行周踐沙漠
蓋萬餘里邊人賴其惠進爲侍郎官朝散大夫海漕歲
運米三百萬石以饋京師舟至直沽則命戶部官一人
往督其運公凡四往彼皆悉其廉明不敢爲姦米盡完
好不雜陞中議大夫同知河間都轉鹽運使司事公深
恤竈民之苦工本親給與民官屬不敢有所掊克值秋

大雨颶風溢潮舟壞沒官鹽七萬五千餘引死者三百餘人公力陳於朝復散楮幣令民煮鹽以當其數又給死者葬具竈民感公之惠繪像事之至順三年進亞中大夫兩浙鹽運使公經畫有方課先諸漕以集仍補前改所負鹽十萬引廷臣嘉其能請賜酒幣勞之時今天子新即位大會宗親賜予蕃渥白金不足分命鹽漕代償公設法取之而商不擾元統初元徵拜戶部尚書朝廷以錢穀爲重非精熟練達者不授公厯主事郎中侍

郎凡財利出入盈縮咸悉其數於是節省冗費尤夥至
元元年詔選郡守宰臣以公應詔出爲大名路總管郡
境方旱公下車數日雨以霑足聞歲則大穰官歲和市
綺素於民而直不時給積多至四百萬緡公屢以爲言
始給其直民力以紓府署譙門及韓忠獻王祠歲久將
壓公治完之楮幣之易以使民用吏或滯之公申嚴舊
規以去其弊課稅之徵以經國費賦入不實公選人督
視以盈其額吏之濫者黜之民之寃者辨之文書下州

縣皆畫刻時以遠近難易爲期衆莫敢違旦望入學令諸生講誦經訓以程其業敦勸耕稼裁抑游墮使各食其力三年夏河北大水水入郡城沒官民舍且盡公朝服致禱捐俸募能治水者立給賞分命有司縛木爲舟以救民又發官廩以食之豪強或乘時肆攘奪公痛繩以法亟使人告言於朝天子爲遣官賑恤所全活者不可勝計此公之有功於魏魏人所以不能忘也公終更二年吏民挽留弗忘公歸卒年七十有一祖妣劉氏繼

陳氏妣尚氏劉氏尚氏俱贈太原郡夫人娶楊氏封太原郡夫人繼周氏皆先卒今夫人趙氏子男曰仁將仕郎武備寺知事孫男益也先儒有言兩漢名臣多出於丞史小吏非丞史之能出名臣也乃知古雖吏屬亦必選用賢材焉我國家之用人也內而卿士大夫外則州牧藩宣大抵多由吏進可不重其選歟公敝厯中外垂三十年理財治民皆以能稱宜有銘銘曰

在昔國初天啟昌運於時豪傑咸思振奮或陳謀畧或

屬橐鞬攄其智勇乃翼乃前海宇既平爰立法制九有
同文比比試吏有美王公冠珮于于不枝不矜珥筆以
趨郎官之庭御史之府奉三尺法孰敢踰矩詔從大臣
往撫遐荒恩涵澤濡遠人所望時稱其材再司鹺政賦
入有經民弗告病晚典魏郡惠愛孔多魏人思之播爲
頌歌吁嗟王公焯有能績凡爾法家過者宜式

元故奉議大夫河南行省員外郎致仕贈嘉議大
夫真定路總管和公墓碑銘

和氏占數東平陽穀縣世葬縣西六里之原有因官家
濟州任城者既卒歸葬於鄉其子兵部尚書元昇徵文
以表諸墓按公諱洽字伯川至元十年起家試西夏中
興路勸農司掾久之擢屯田丞遷濟州判官大德初轉
益都高苑縣尹歷尹濟之沛單之單父二縣延祐元年
以河南行中書省左右司員外郎致仕又三年卒我國
家既定中土務先民急而版籍刑章食貨工作樞機品
式之制必得精敏通變之才始周其用故一時豪傑羣

起而爭趨之當中統初故相張忠宣公行省中興邊防
既寧乃疏唐來漢延二渠溉田以利其民及立勸農之
官辟公爲掾其後又立屯田長官擢公爲丞故於灌溉
之方播植之利深有力焉會西鄙有警公集強壯者守
城堡老幼護堤防而轉輸供餽不絕事平甘州宣慰司
以其功聞遂佐濟州州當水陸要衝侯藩朝覲要甸貢
賦舟車相望迎候無虛日公應務優暇而民政亦修高
苑歲凶公下車諭吏以民方乏食一切不得橫有誅求

又捐俸倡富民出粟以賑貧者衆賴以安初朝廷歲命
衛士以駝馬分飼民家及聞民多被擾始命郡縣築駝
圈作馬廐官吏董之庶幾編民不至受害公時在沛買
地三十畝作馬廐數十楹又建風雨雷臺以謹時祀又
濬棘塚處塚清水甘沙四渠以通漕運工築雖勤公親
視之財省而民不知勞是時朝野寧謐年穀屢豐按部
使者巡行郡國皆清整嚴峻故守令亦多守職奉法而
民獲被其惠澤焉公仕四十餘年官五轉而至六品階

六遷而至奉政大夫享年七十有二卒以延祐三年三月十有六日葬以是年四月某日考府君諱順妣劉氏配張氏享年八十有五卒以元統二年七月十有三日合葬公墓子男五人元謙歷晉州安平縣主簿易州涑水縣尹卒官承務郎蘄州路蘄春縣尹元昇歷應奉翰林文字翰林司直知趙州德州同知真定路事河南嘉興安慶三路總管進拜尚書正議大夫致仕元恕歷福壽院照磨汝寧西平縣尹河南稻田提舉裕州知州卒

官朝列大夫同知大名路總管府事元清濟州蒙古學
正元孚新店開提領女二人適朝請大夫同知溫州路
總管府事李伯榮封真定郡君次適奉訓大夫昌國州
知州嚴毅封沛縣君孫男四人懋黃州路錄事司判官
忠志思未仕孫女二人長適將仕郎德州齊河縣主簿
陳志雲次適敦武校尉侍儀司通事舍人楊思文封宜
人公先世勤於稼穡至公讀書入官清慎自持治獄平
恕所至以愛民濟物爲心不求赫赫之譽而人亦多稱

之嗚呼官之比民者莫切於守令或深文峻法以干名
或玩歲愒日以苟祿斯民何賴焉公之父子俱以材敏
列官郡縣又以循廉見稱於時是宜有銘以紀其世公
以子貴贈官嘉議大夫真定路總管上輕車都尉汝南
郡侯考府君贈亞中大夫東平路總管輕車都尉汝南
郡侯妣劉氏配張氏俱封汝南郡夫人而諸婦亦以夫
貴受封命焉銘曰

唐虞建官首命羲和惟和受氏傳緒衆多晉漢之間凝

家於鄆陽穀之宗豈其苗胤公服官政豈弟愛民天報
之豐多子多孫多子多孫克守家法不忤不求施用不
乏或紆墨綬或持郡符歲時來歸車騎甚都天子有錫
恩及考祖閨庭禮嚴亦有命婦衣冠之盛萃於一門耀
爾州里華爾宗婣福慶之緒其來無止尚思忠孝勗汝
孫子陽穀之野有木惟喬刻銘貞石德音孔昭

元故亞中大夫河南府路總管韓公神道碑銘

并序

復號至元之二年三月壬申亞中大夫河南府路總管

兼本路諸軍與魯總管管內勸農事知河防事韓公以疾終於洛陽官舍享年五十有二是歲五月戊申載其喪歸七月己酉葬宛平縣高麗莊之原又十有一年諸孤以太常博士金華胡助之壯請銘公神道之碑昔者世祖皇帝克大一統凡殊方絕域豪傑智謀之士隨其才器而登用之故能招徠羣工震疊九有治功興而天下定矣公起家朝鮮入直環衛敷歷歲久位列通侯是宜著銘以表其墓豈特昭示寵光覆被韓氏子孫實維

表率忠勤以爲外藩臣工之勸初闢隴陝洛之郊號稱
沃土國家承平百載年穀豐行民庶樂康然自致和之
秋軍旅數起飢饉荐臻民之流亡十室而九自是朝廷
數遣重臣出粟與幣以惠活之蠲除租賦以休養之擇
選官屬以撫安之既久而後事稍得寧公當天厯二年
由臺臣薦擢僉河西隴右道肅政廉訪司事時餓莩載
路存者無以爲養公悉心賑救務施實惠全活者不可
勝計巡行郡國糾劾貪邪風采大振歲餘選爲陝西行

省左右司員外郎兵荒之餘法制寬弛公舉行墜典而樞機品式寢復其舊關中地大人衆去京師又遠錢穀多徽州縣幕職故多版授時銓曹法壞貪吏方緣爲奸間有富庶之所衆皆借爲奇貨公在銓籍名次先後復以缺爲等差一日忽坐省中唱名注擬即謁省門銓吏不得高下其手衆服其公未幾省官曹掾因坐他事皆免惟公獨無所污遂遷河南總管公下車訪求民謨度其緩急而施行之郡當西南孔道使者交馳驛騎多死

公覈實驛力得富實者若干皆奸民久避役者即日趨
事貧窮者悉聽免歸而驛傳始不乏矣肇新驛舍及幃
帳衾褥器皿使者之至如其家然以廟學門廡傾圮繕
完如初且朔望帥僚吏聽講經訓冀習知其廉平之理
又置更漏謹其晷刻以警朝昏又葺惠民局修藥餌以
活貧人之有疾者蓋河南昔經兵難民多徙死公私廬
舍聖賢祠廟盡皆毀壞公到官未久百廢俱興大則出
官帑小則割俸以倡富者樂於輸財貧者皆願雇役故

人不擾而事集蓋深得古人救荒恤民之意焉於是政聲流布遠邇凡他郡刑獄冤抑田宅婚嫁訟弗決者行省憲府屢以屬公皆隨事裁遣衆悉推服及聞公薨咸悲思之公諱永字貞甫居本國之清州世以儒術爲業世祖既奠天位萬邦來庭維高麗王尚主聽還其國乃選世家子弟二十餘人爲質於朝公考亦在選中久之歸仕其國子孫因家京師公以大德七年入備宿衛未幾成宗皇帝命掌服御爲近侍時宮禁邃深法制嚴整

公扈從出入小心慎密及仁宗皇帝爲皇太子公復被
召在其左右仁宗愛尚文學公時時進說故事至大初
元年官承務郎資武庫提點遷奉議大夫壽武庫使轉
利器庫使皆武備寺所屬國家初以武定天下故於甲
兵所藏不輕授人公居其職凡十餘年出納無虞延祐
七年遷奉議大夫大寧路錦州知州又遷高州公習熟
二州之俗故其爲治也本之以寬仁守之以廉靜民被
其惠吏服其能及遷遼陽路懿州知州未及上遂有僉

憲之命公性明敏幼若成人喜怒不形於色稍長愈善文學國人敬焉及涖官臨民寬厚豈弟未嘗疾言遽色勤於政務至忘寢食持守潔白一毫不取諸人奉身清約恒以圖史自娛齋居終日澹如也捐館之日室無餘財聞者益重其操公五世祖奕仕其國爲尚衣直長同正生子希愈儀仗府別將曾祖考光胤朝請大夫禮賓卿卒贈金紫光祿大夫守司空右僕射祖考康匡靖大夫都僉議中贊修文殿大學士監修國史判典理司事

以世子師致仕卒諡文忠公考謝奇朝奉大夫右司議
知制誥三世皆以進士及第曾祖妣陳氏本國富戶長
慈之女封通義郡夫人祖妣任氏禮賓少卿龍臂之曾
孫權知監察御史克和之孫禮賓注簿同正全祐之女
金紫光祿大夫政堂文學禮部尚書寶文閣大學士判
兵部事諡章憲公鄭某之外孫女封牙善郡夫人妣蔡
氏繼妣鄭氏本國大相良祐之女封利城郡夫人公鄭
出也既仕聖朝階官三品天子推恩贈其祖中順大夫

僉太常禮儀院事上騎都尉追封高陽郡伯任氏封高
陽郡君考贈翰林直學士亞中大夫輕車都尉追封高
陽郡侯蔡氏鄭氏俱封高陽郡夫人公配崔氏累封高
陽郡夫人子男三人長孝先由近侍累遷太府監右藏
庫副使征東行省左右司員外郎資政院都事擢拜江
南諸道行御史臺監察御史次仲輔侍儀司通事舍人
次文獻給事儲宮天爵既序公行治官封卒葬壽年仲
輔曰吾東國之俗凡筮仕結婚必各徵其族世外家非

勲貴之胄不得補官非衣冠之世不許作配蓋有古人
仕者世祿崇尚氏族之遺意請並著之銘曰

朝鮮之東箕子所封遺教猶存蔚有華風自昔其國風
俗好儒設科取士誦詩讀書矧逢聖朝海宇咸一東土
承風誕沐文德有美韓公起自儒家入侍天子允著才
華出領郡符分持憲節春陽之溫美玉之潔民受其惠
吏畏其威闕陝東西咸有去思公用弗極公有賢子言
論雍容進拜御史惟仲與季出入禁庭執事有恪繼美

父兄尚事華學清慎周密克孝與忠世贊皇國豈惟恩寵東土之光益大其宗百世之芳

元故正議大夫僉宣徽院事周侯神道碑銘

正議大夫僉宣徽院事周侯諱貞字幹臣以至正元年十二月廿一日卒葬保定清苑縣延育鄉延福里先塋之兆其子克敬徵銘以表墓道按周氏世家清苑侯曾祖諱某國初以才勇爲義軍萬戶能保全其鄉邑祖諱元積善好施以賑親族因侯貴贈亞中大夫廣平路總

管輕車都尉汝南郡侯考諱普讀書業儒材不克顯而
歿贈嘉議大夫保定路總管上輕車都尉汝南郡侯侯
早聰敏既長思樹功名乃遊京師學國語數月盡能之
擢翰林院譯掾語益精熟出官將仕郎監廣盈倉出納
無弊進承務郎佩金符慶元紹興等處海運副千戶在
官四年在舟再涉海而不以爲勞中書錫宴及賜錦幣四
襲遷奉議大夫東勝州知州侯下車作新學宮士亦往
往來游焉學舊有田二千餘畝比年豪民冒種士無所

訴侯稽故籍悉歸之諸學士刻石頌侯美歲餘政教修理民有兄弟爭財久不能決侯以理諭之兄弟慙悔卒爲敦睦之行儒生耿某喪親廬墓侯率屬吏表其孝行仍分祿米以周其貧民愈化服遂除和寧兵馬使進官中議大夫邊庭法制寬簡盜多未獲侯馳驛數千里乃盡獲之悉致於法盜亦屏息中州良家子女被賣於邊者衆侯索得之歸其父母家咸繪侯像事之捐俸建龍沙書院民亦有興起者焉廷臣嘉其能擢拜中興路總

管江淮之田履畝而稅貧者或無地入租富者或徼倖
獲免民有輸米沙市倉者五百餘家貧實無地有司徵
求榜掠無已行省屢命核實數年不絕侯到官月餘即
正其事民皆神之漢江之水岸善崩其曰象鼻嘴者官
築倉於上歲役民數千人修完之民不勝擾侯命作堤
護之親董其役樹以竹木積以土石堤長若干里力省
功倍堅完可久民曰俾吾歲無脩築之勞者周侯力也
相率著其遺愛焉進僉宣徽院事侯以年老乞致仕卒

時年七十有一祖妣妣皆王氏俱追封汝南郡夫人娶
劉氏封汝南郡夫人侯兄弼承務郎大名路清河縣尹
弟誠子男二人長克明出繼兄後將仕郎淮安路總管
府知事次則克敬居侯之喪不茹葷酒鄉閭以孝稱誠
之子克恭東鹿縣稅務副使女三人長適太宗正府譯掾
王國器次適儒士劉秉善次適僉左都威衛指揮使顏
伯瑛孫男恕也昔我國家撫定海內收攬豪傑隨其才
器大小而任用之入官之途蓋不一也世祖皇帝始制

國字以通語言中國之民亦皆使之盡學焉故人材率
多由是而顯若周侯者蓋其人哉故爲之銘銘曰

維皇建國於燕之域九有來賓如星拱極矧茲清苑密
邇神京民生其間詠歌太平或承寵光進爲卿士秉笏
垂紳紆朱曳紫有美周侯譯掾起家致身通守萃其暉
華若昔國初豪俊輻湊戰征方殷蝨生介冑殆逢治安
富貴尊榮游優文墨保有令名侯所歷官興學敦善民
俗承風亦克用勸頌其遺愛載諸貞珉又列銘章以貽

子孫

元故奉訓大夫冠州知州周府君墓碑銘

周氏爲燕名族金贈儒林郎企生子安貞登皇統五年
進士第累官中議大夫咸平路轉運使其弟宣武將軍
河間草場使安吉生鎮國上將軍杞縣令璧璧生蔡州
節度判官天禧國初燕京行省辟充詳議官生奉政大
夫右侍儀使鐸鐸生二子長曰翰林侍講學士中順大
夫知制誥同修國史之綱次即君也諱之翰字子宣我

國家既定中夏太保劉公奏起朝儀侍儀公佐之遂成一代之禮夫人王氏翰林學士承旨文康公鷲之女讀書賢明教子有法君與侍講早歲皆以儒名侍講以朝命出繼文康公後君次當蔭父官推讓從兄之幹久之擢侍儀舍人滿考再爲之復充法物庫直長出官將仕佐郎主滄州清池簿未上大司農司辟爲掾進本司照磨擢侍儀通事舍人轉承務郎武備寺經歷出爲淮安路推官進拜冠州知州到官五月而卒至順元年二月

二十一日也享年六十有五歸葬良鄉縣南呂里先兆
君自元貞初入仕六命而至郡守階六轉而至奉訓大
夫當朝廷承平之日又佐人以爲職故不克大有所施
獨在侍儀明習禮文之事嘗述朝儀備錄五卷朝儀紀
原三卷以進蒙賜幣帛命以其書藏史館及官淮安民
有殺其子而誣仇人殺之者有誤繫人死有一鍛鍊爲
故殺之者有因中酒而死其家誣人毒死之者獄具君
一一辨之民大稱善君嘗問學於楊先生時煦文康公

時賓客曰集其門故君於近代故事一時偉人悉能知之居官廉慎毫髮無所私少嘗拾遺於路追及其人與之蓋其爲人溫厚和平能以禮義自守者也其配敬氏燕京提舉學校官大寧先生鉉之從孫太常博士元長之女中書平章政事儼之女弟也子男曰驤國子積分出身奉聖州判官擢中書掾歷文林郎都護府都事擢拜江南行臺監察御史次駿廕官進義副尉主亳州城父縣簿周氏自金皇統迄今至正垂二百年而詩禮衣

冠之傳不乏可謂盛矣宜有銘以著其世銘曰

幽燕之郊天挺雄豪世服韃橐云何周氏祖及孫子蔚
乎多士遭逢明時執禮誦詩溫溫其儀朝有大會冠裳
玉佩臚傳九拜雒雒淮城汝往司刑死者復生維聖之
制刑本於禮民率興起世祿之家克慎弗奢益振厥華
咨爾來裔家學是繼尚永其世

滋溪文稿卷十七